

CONVENIO DE COLABORACIÓN ENTRE A CONSELLERÍA DO MAR E A UNIVERSIDADE DE SANTIAGO DE COMPOSTELA PARA O ESTUDO DOS EFECTOS DA CARGA DO CULTIVO DE MOLUSCOS SOBRE AS RÍAS GALEGAS.

MEMORIA XUSTIFICATIVA

Patricia García Sánchez, directora xeral de Pesca, Acuicultura e Innovación Tecnolóxica da Consellería do Mar, **DECLARA:**

Que esta Dirección Xeral de Pesca, Acuicultura e Innovación Tecnolóxica ten formalizado coa Universidade de Santiago de Compostela o instrumento convencional arriba referido por un período de vixencia que abrangue dende o 04/11/2024 ata o 15/12/2026.

Que o instrumento convencional ten por obxecto:

Establecer os termos e condicións polas que se rexerá a colaboración entre a Consellería do Mar e a Universidade de Santiago de Compostela, para a realización do estudo dos efectos do cultivo de moluscos sobre as rías galegas.

O obxectivo central deste estudo é coñecer o efecto que os polígonos dedicados ao cultivo mexillón poden ter sobre a calidade e produción do ecosistema das rías galegas, avaliando tanto o seu efecto depurador como concentrador de contaminantes químicos, orgánicos e microbianos, o seu efecto sobre a calidade do ambiente sedimentario e da auga, así como sobre a dispoñibilidade de recurso alimentario para outras especies. Así mesmo, avaliarase o seu potencial efecto sobre o cultivo doutras especies.

As accións específicas que se van realizar derivadas deste obxecto son ás seguintes:

a.-Modelización do efecto de captación e dispersión de contaminantes desde os polígonos de cultivo masivo de mexillón a outras áreas das rías, co fin de poder predicir, por un lado, o seu potencial efecto modulador da contaminación antropoxénica e, por outro, as zonas nas que os residuos destes polígonos poderían estar acumulándose.

b.-Avaliar o efecto do cultivo de mexillón sobre a composición e os procesos bioxeoquímicos definitorios da calidade do ambiente sedimentario mariño, e a súa potencial implicación sobre a produtividade doutros cultivos existentes nas rías.



c.-Estudar o efecto modulador do cultivo desta especie sobre contaminantes orgánicos específicos de orixe antropoxénica e relacionado co propio cultivo, así como a súa dispersión fóra das áreas de cultivo.

d.-Analizar o balance redutor/concentrador de axentes microbianos e virais de risco que, por un lado, pode favorecer a redución dos niveis de contaminación microbiana antropoxénica en determinadas zonas, pero, por outro, pode implicar dispersión destes a outras áreas da ría.

e.-Coñecer a implicación e repercusión da enorme capacidade filtradora desta especie sobre a dispoñibilidade do zooplancton, como recurso natural para a alimentación, tanto da propia especie como doutras especies de interese para o cultivo.

Que existe converxencia de intereses entre as entidades asinantes en orde á consecución do obxecto referido.

Que o instrumento convencional que se pretende asinar se fundamenta no seguinte:

O Estatuto de Autonomía de Galicia atribúe á Comunidade Autónoma, no seu artigo 27º.15, a competencia exclusiva en materia de acuicultura. Neste sentido o artigo 3.4 da Lei 11/2008, do 3 de decembro, de pesca de Galicia, modificada pola Lei 6/2009, do 11 de decembro, establece que dentro das materias correspondentes competencia da Comunidade Autónoma as relativas ao exercicio da acuicultura mariña serán aplicables a todas as actividades acuícolas que se desenvolvan en terra, na zona marítimo-terrestre, nas augas marítimas interiores, no mar territorial e na zona económica exclusiva correspondente ao litoral de Galicia.

A Consellería do Mar ten entre os seus obxectivos prioritarios prestar apoio ao desenvolvemento da acuicultura, polo que cómpre dispoñer dun coñecemento máis profundo da actividade acuícola a través do estudo da capacidade de carga das rías galegas, co obxecto de acometer cantas actuacións se precisen para o seu desenvolvemento sostible.

A Universidade de Santiago de Compostela é unha entidade de dereito público que desenvolve actividades de formación, investigación e desenvolvemento científico e tecnolóxico, interesada en colaborar cos sectores socio-económicos e as institucións públicas para asegurar un dos seus fins da formación e da investigación, que é a valorización e a transferencia do coñecemento ao servizo da cultura. Para o mellor cumprimento dos seus fins, a USC manterá relacións con centros de investigación e con institucións culturais e sociais, e impulsará a celebración de convenios de investigación con entidades e organismos públicos e privados, así como de contratos para a realización de traballos de carácter científico, técnico ou artístico.



Que a Consellería do Mar e a Universidade de Santiago de Compostela consideran esencial o establecemento de accións conxuntas de carácter colaborativo, compartindo os riscos e obxectivos que permitan realizar os traballos de investigación e desenvolvemento para realizar estudos referentes aos efectos do cultivo de moluscos sobre as rías galegas.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, de 8 de novembro, de Contratos do Sector Público, ou doutro instrumento alleo á natureza estritamente convencional.

En atención ao exposto, e a fin de dar cumprimento ao preceptuado no artigo 15.2 da Lei 1/2016, de 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

E para que conste, asínase esta memoria, en Santiago de Compostela

